

# 《大乘理趣六波羅蜜多經》法要

罽賓國三藏般若奉詔譯 寂慧

## 靜慮波羅蜜多品第九之一

佛告慈氏菩薩言：佛道遙遠，無人能到，唯有一法饒益有情，所謂正定。若諸菩薩未獲此定，其心未得清淨不動，生死涅槃無有二相。如是靜慮清涼之風，能除性空妄想雲翳，正定滿月出現世間，大悲光明能除有情諸煩惱熱，使得清淨安樂涅槃。

復次，欲修靜慮波羅蜜多，先：1. 親近善知識。2. 受持淨戒。3. 捨離世間治生販賣、種植、根栽。4. 善攝六根。5. 身口意業不動。6. 於身善起防護，不應放逸；以大悲真言，令諸有情所求滿足。

佛告慈氏有十六種靜慮波羅蜜多，一切聲聞、獨覺所不能知。

復次，修靜慮者有五種障，所謂五蓋：貪欲、瞋恚、掉悔、昏眠、疑蓋。

由此靜慮，起五神通，所謂天眼、天耳、他心、宿住、神境智證通。

如是靜慮，發心非難，長時不懈，能成就者，是則為難。

復次，煩惱怨家，惡羅剎鬼，供於色香，煩惱轉熾，難可調伏，何能修習禪定解脫，既無禪定何有智慧，既無正智，十善亦無，當墮惡趣，以是因緣，菩薩應修梵行四無量心：

起無緣慈，普遍法界，何以故？菩薩大慈，無有齊限，不可思量，無邊際故。一切有情，遍十方界，菩薩大慈，亦復如是，以是當知，有情無盡，菩薩大慈，心亦無盡，真空無盡，慈亦無盡。

慈有三種：1. 眾生緣慈2. 法緣慈3. 無緣慈。

佛告慈氏：修行靜慮波羅蜜多，應當修習大悲無量。此大悲，於諸善業而為導首。一切有情我應救護，故名大悲。又此大悲者，能作方便，成辦一切，助菩提故；又此大悲能悟，無師自然智故；又此大悲能除一切自心熱惱，隨有情為饒益故。

此大悲心有五十種。

云何修習，大喜無量？

所謂憶念一切佛法，愛樂恭敬，不住生死，不壞喜心，除諸邪見，離五欲蓋，能安有情，住真實際。又大喜者，體真勝義，性無生滅，不沉不舉，無去無來，常爾一心，名真喜悅。

云何修習，大捨無量？

修捨無量，總有三種：1. 煩惱捨，於諸有情，其心平等，於所愛境，心無貪著，設見嫌恨，亦不生瞋。2. 護自他捨，第一義中，無傷無害，故名為捨。設被傷害，亦不損他，是名為捨。3. 時非時捨，若諸有情不受教誨，非法器者，菩薩不瞋，名非時捨。若於諸法應成就事，決定應作，精進勇猛，長時無倦，無暇無退，不辭勞苦，乃至事畢方可故捨，是名時捨。